

湖
海
詩
傳

湖海詩傳卷二十

青浦王 昶德甫輯

盛百二

字秦川號柚堂秀水人乾隆二十一年舉人官淄川知

縣有皆山閣詩集

蒲陽山房詩話秦川世家科第厚恩詞章兼耽經誼所著尚書釋天雖未精通惟步而星躔日軌多所發明晚注山東萊城書院所學益深詩宗小長蘆亦抒寫自如異乎世之塗澤者

題柚

先府君令龍川時官舍東西齋各有柚一樹東樹瓢
微紅西樹瓢白而微碧味更勝爲邑中冠予攜核以
歸種之堂北十七年不花丁丑春余入長安其歲始
花垂實六且大味亦不減於粵十月歸里見餘果二

一投瓜田徵君張丈張丈繪圖題詩并爲說以贈又
以其一竝徵君說呈於司寇香樹先生先生亦題詩
又別爲圖竝書詩與說彙成卷屬百二題詩於左作
吾鄉嘉話俾後之志物產者有取焉

淮海惟揚州厥貢兼橘柚實橘之魁體壯壓橙榛榮讓桃
李先凋與松柏後殿春花始敷入夏子乃逗晚秋色懸金流
芬入清歟擘之滑肌膚剖處循理腠液解步兵醒殼已督郵
嗽名雖雲夢同味則交廣厚憶昨鯉庭趨齒方陸續幼臨窗
對嘉樹垂實滿涼罔素中含碎玉甘裏醞重酎品第一城推
風聲鄰邑購自從歸五湖此味不可復初疑物性遷或謂書
傳謬非無閩舶傳中乾皮外皺幸有懷核存種之北當雷李
甲油然生扶疎忽爾茂雪壓霜更欺幹挺直不仆彈指十七

年濃陰空自覆竊慮化爲條

爾雅抽條疏云抽一名條案此則終南有條亦卽抽但不花不實

私心默

自祐去年長安遊歸及日在魏開軒覩碩果狂喜繞庭走喧
然動里閭求者爭輻輳應接若不遑強索或遭詬好事瓜田
翁揮圖冒償售深情猶未已著說白司寇胡盧竊自嗤彫節
竟忘陋篇章敵華哀珠玉耀圭竇他年光志乘紀歲在丁戊
遭逢袖亦榮千古一時妬不羨同瑤琨包貢錫夏后

畫魚歌贈江陵尋源子

尋源先生工畫馬奔走龍媒來筆下先生畫馬復畫魚筆迹
殆過徐子虛無端滿室動寒碧鼓鬣揚鬐紛絡繹桃花潭水
百丈深掉尾跳波拋玉尺一魚前導來堂堂羣魚連貫如雁
行小魚散散自成隊靜依萍藻含風涼雙雙健鯽更堪愛噉
嚼吻沫宛相對不憂鉤餌近鮮鱗信兩行遊總無礙殊形盡

態勢莫同墨所到處天然工世人刻劃太癡絕真意乃在模
餉中炎天盤礴僧房裏揮灑終朝數番紙須知託興良有以
想見先生心若水縱然別幅寫驂驪肯爲千金售燕市

題王述庵先生三泖漁莊四時圖卽用畱別

昔年曾作茸城客三泖扁舟趁潮汐九峯天際浮青嵐一片
波連海雲白陰晴變態已熟嘗寒暄景物隨所適東風三月
千花明春水玻璃萬重碧礮車發豎龍掉尾雨腳騰空如曳
帛清宵放艇櫓嘔啞皎月冰壺涵素壁有時飛雪灑寒村草
閣茅檐遮羃歷佘山厓公堪指點孤塔中懸水精域述庵家
在圓泖東蒹葭想象伊人宅十載神交識姓名悵望烟波睽
咫尺竭來傾蓋人海中氣誼交情等金石借書喜近春明坊
問字相從數晨夕蕭然時有出塵心鳳閣嶠坳聊寄迹三泖

披圖認舊莊漁艇漁竿猶歷歷自言準著遂初衣家山暫作
三年隔吳儂本住五湖濱一水相通情脈脈連歲長安苦滯
淫今朝穩挂南歸席何年相約共往還借我漁莊船一隻

魯城東南六七里有石人二皆西向一鐫缺一字樂安

太守庶君

缺字省志作棠縣志作葉家

一鐫府門

缺二字志作之卒

皆在紳下孔

君莊谷搗以寄贈賦詩答之

辭漢金人淚暗滴何處摩挲歎銅狄巋然不見魯靈光一例
西風吹瓦礫石人乃得全天年偶立千秋古道邊樂安太守
爾誰是姓氏猶在名無傳古道離離遍禾黍但向斜陽日延
佇千呼萬喚不肯回忍觀蓬萊變塵土日暄雨洗換年光碧
蘇紅羅作繡裳紙錢飛散白蝴蝶寒食何人澆酒漿斷冰詞
客好事者獨往驅車弔原野古隸龍文搗寄來翠墨寒濤我

心寫宇文石鼓等兒孫苦縣光和是弟昆遙知月冷清霜夜
石人相對語精魂

望君山

雲夢何曾足芥胸真令汗漫笑吳儂不辭楚塞三千里來看
君山十二峯馥郁微聞動蘭芷徘徊空憶採芙蓉長風忽引
孤帆轉興入蒼梧翠萬重

三十六灣

嫋嫋江邊蘆荻風蘭舟連夜發湘東笛聲三十六灣月誰念

當時白石翁

夜深吹笛移船去三十六灣秋月明姜堯章寄湖陰蕭下殿句也不知何時訛爲許丁郊而長沙志亦仍其謬

將之揚州夜過平望作

江豚吹浪夢還驚來去三湘萬里程却喜櫻桃湖外月今宵

猶作故鄉明

楊誠齋平望詩櫻桃湖裏月如霜即影照湖也

一霎輕帆趁曉風中流歌嘯自從容江神有約勞相詩要聽
金焦兩寺鐘

朱雲駿

字逸湄金匱人乾隆二十一年舉人官隆昌知縣有詩
九種統爲畫莊類稿

蒲荷山房詩話予自然至蜀路過隆昌夜宿官齋逸湄置酒山示其積畫蘆
華諸集其詩冲和嫺雅不惟牧令中無此人卽梁溪諸君子亦無能京駕也可如
薄醉易消縹緲後殘陽正擁亂峯間蘆芽過雨添新綠羅甲迎秋發嫩涼白石清
泉琴寫韻紅花翠條眼增明白飯青初銜雨客鳥絲紅袖落花天皆清麗辛眠或
謂其如姚武功梅都官殆未然也

春日游讀書山懷元遺山先生

春烟澹欲流禽聲導客往山行曲愈好步窘勢轉上徑斷溪
橫橋水消水平掌澗瀑懸山顛墜襟快滌盪遊歷逮茲辰聞
名自疇襲流風如可親對境足欣賞

古人不可及非徒尙詞翰出處有本性此際良獨難高名震
山斗事定待闔棺箠仕興定初天典列史官凋敝日益甚簪
筆涕洟瀾國亡終布衣家訓傳南冠

性正氣亦正跌蕩雄國并聲名世耳食知已惟一兄四十五
年間毀譽何轟轟習俗安汚流所葆遂不貞錙銖較利害俯
仰隨重輕所以貴壁立君子豈好爭

職本任史官記注敢貽謾舟師忽東狩國史請保護時相目
以迂零落不復顧艱危野史亭貞節葆歲暮身在國史在豈
雖徇國祚吁嗟絳雲樓志但希遭遇

題顧晴沙戶部試泉圖

山光清襲人夜雨洗山月清泉林杪飛雲氣偏毛髮落澗勢
洄漩稜稜露石骨幽居傲巖扉空翠環園宅悠然太古前夢

迴茶乳白世味一不罏飄洒漱蘭雪憶昨耽游山梯空上突
兀徑仄手扶筇興酣脚不繫佳境輒遇君竹鑑賞遺迹相對
神自怡往往煩襟釋十年出處分君名滿京闕在山泉水清
願言慎始卒

觀音碣

千里鬱岩巖大造閻精奧觀音碣絕奇蟠空駭排狹另插
青冥垠塲入深隩巖巖氣象雄稜稜丰骨傲終古烈日熏懍
秋陰雨膏裹水悍莫當突立衆流倒峙巖徑中斷危地不敢
蹈中丞得賈公膠辛苦事鐫鑿舊築書大字陷壁錫嘉號舊
問王保賈中丞易今名我知大士心拯物同覆冒在在見靈通隱隱化凶
暴履險敬倍深彷彿慈雲導

五丁峽

客從沔陽來川原愛平敞西窮蟠冢山漾始浮菰蔣峽口水
飛騰漢江迺千丈入峽氣陰沉朔吹透簾幌四望昏霧迷欲
行苦惘惘葱鬱礙犀株蒙茸徧篠簜五丁昔開山神力何英
爽渾淪元氣中一嶺析爲兩竅穴倍玲瓏澗泉互泱泱磧絕
猿鳥蹤青冥仰逾上山險孕育奇龍蛇寔雄長撥雲入交輿
託命瘦筇杖胡不鏤眉峰再煩巨靈掌水木餘清華令我發
眞賞

昭化縣

烟際帆初卸孤城景物幽人家濱桔柏故國屬苴侯飛鳥投
岩月清飈發棹謳只愁明日路捫葛上牛頭

劍州

畫角嚴城動弼弓 盛世巖峰看青士削馬踏碧雲高要害

同三峽規模陋百牢
挾旬行石棧于役敢言勞

叙州卽事

山谷舊曾游
浮生復此留
涼風吹木杪
秋氣滿戎州
蒼峴雲根峙
清江郭外流
百蠻遺俗改
安化服先疇

宿遷懷古

雲鴈影南征
人過下相城
史才編本紀
天命屬炎精
嗚咽空流水
蒼茫感廢營
英靈知未泯
濁酒爲君傾

約過錫公雨阻不果

甚喜幽居近
論詩每過君
杏花何處放
春雨隔牕聞
風色懷殘照
禽聲在白雲
清吟成獨賞
悵悵爲離羣

七夕晴沙寓齋作

一抹清光入畫簾
疎星耿耿動遙瞻
夜闌蟲語聽逾靜
月轉

梧陰與未厭小集溪亭烟氣澹早涼衣袂露華霑劇憐佳會
人離別料倩燈花子細占

盤豆驛寄懷諸同學

挂帆暑月別東吳猶記清鷗泛綠蒲詞客艷稱金鴈驛秋晴
纔過玉娘湖流連徧覽中州勝憑吊時嗟逸興孤寄語九峰
吟嘯侶肯馳尺素慰長途

潼關

隔岸遙青見首陽雍州天險此分疆蒼涼蜀棧秦關客盤礴
河聲嶽色旁戰壘千年驚鼓角風烟萬里接蠻荒廢興舊蹟
垂前史取次摩挲寄慨慷

紫柏山謁張留侯祠

圖報韓讐願已伸翠屏仙隱

石壁題
四大字

閱千春素書未必真傳世

黃石何從訪異人直與商山同去就肯從鐘室話悲辛遺祠
薄采溪毛薦蟬蛻塵區迴軼塵

聖水橋

楊花團雪趁吟鞭恰好班春景物妍橋颺青帘通亥市溪流
碧玉瀉雲泉新秧弄色含槐雨飛鳥依人語竹烟小吏亦知
情不淺先安筆硯豆棚前

劉秉恬

字德引號竹軒洪洞人乾隆二十一年舉人官至倉場
侍郎

送述庵司寇 予告南還

白雲亭畔得抽身紅藥階前憶宿因

公中乾隆甲戌進士歸班候選知縣
丁丑年 聖駕南巡公進獻詩賦

考列一等奉 旨改內閣中
書舍人盡公出仕之始也

七袞懸車符古訓三春鼓棹荷新綸

三告

有令子春融後啟
程歸里以示優恤

投簪此日歸田客倚馬當年草檄人

公會兩次從
軍掌摺奏

黃

鳥翩翩楊柳舞臨風勸酌莫嫌頻

凌應曾

字祖錫號叔子上海人乾隆二十一年舉人

滿揭山房詩話叔子出榆山少司馬從子蘇黃山時詩景工如天竺寺云法鼓時
一聲千山送空響自土發白沙步云日出雨二竿雲中見山頂富春云江緣山逾清
舟行畫圖裏香爐峯云雲中雲微
月忽照香爐峯何如襄陽夢語

鐵索港謠

析安江之浦口亂石怒生牙錯環連數里而遙奔流若激矢長
年刺舟一篇半篙悉中家法不敢越羣希許盤旋屈曲於千萬

劍戟中可云絕險石色沉

黑似鐵土人呼為鐵索港

阿誰鑄鐵作岫巘犖确千尋斷行旅女媧煉石補漏天天星
中夜隕如雨水拍拍峭且激行路難歌偈仄乍疑雲峰奇還
似浪頭黑或如棋盤錯或如機杼織或如兔脫犬或如鴉種
麥或如鬱律蛟龍蟠或如飛鳥驚蛇跡或如牛羊下山麾牧

肱或如鸕鷀銜魚振水翼森森十萬橫磨劍肅肅塗山乘圭
璧沙塲陣幕擊刁斗獵圍禽獸刪磧礫姦奇怪變真險絕輕
刀敗絮攢荆棘獨漉獨漉苦泥濁迷陽迷陽傷我足王道由
來號蕩平何爲世路有屈曲魂夢飛騰叫帝閤我舌猶在嚙
能捫精誠貫日虎豹遁稽首地上蟣蝨臣願勅六丁雷電下
取將鞭之見血驅羣羊投畀禪海擲天外母使當道如豺狼
帝有睟焉顧我笑渾沌不勞鑿九竅陳詞敷衽就重華九疑
山高雲竒窳覺來漁舟有狂客勸我酣歌啜糟粕車輪一日
九迴腸祖䟽何如呼五白伶五斗瓮一石峯嵒歷落可笑人
胸中硯礪誰消得吁嗟乎胸中硯礪誰消得仰眎元天幽且
默

南華山人畫松歌爲齊雲道人賦

黃山臥龍

松

二千尺移根突見雲根側怪底山房春晝寒謾

謾松風生兩腋畢宏不作董羽淪南華散仙來逼真下筆如
松松色古千花萬木羅兒孫長嘯還題幼婦詞詩中有畫畫
中詩鬼神欲入渾沌死妙手無心偶得之道人不種老龍鱗
半幅蒼虬什襲珍他年破壁定飛去三十六峰眠白雲

游翠峰寺

隔溪聞犬吠黃葉閉僧寮清境偶然到塵心此盡銷夕陽明
樹杪湖水澹山椒歸路雲峰外遙遙見老樵

懷王德甫

秦淮花月潒潒夜長記王郎斫地歌歸去吳松倍相憶鬢絲
禪榻奈愁何

蕭霖

字雨垓號曙堂江都人乾隆二十一年舉人官寧洱知縣有費餘昆海等集

舟次宜昌

灘聲不到耳江面忽平曠回首眺三峽遙天插千嶂縹緲十二峰峰峰異形狀湍急景不延岩高路難上滾滾蜀江波於此漸奔放燒餘白起灰怒湧黃牛浪檢點同舟人相視慶無恙前途尙茫茫何時脫塵障

青谿洞

武陵桃花源洞門閉已久南來見飛雲勝境獨稱首茲山亦奇絕宵然深且黝碧流環其前瀕洞涵清瀏中通太古泉潛出土囊口未知誰疏鑿疑是鼇靈手虛札鬱谿訝怪石紛蚴蟉玲瓏剔萬竅閑寂消衆有百神不敢栖我佛爲之守誰與

叩禪關塵纓苦纏糾

太平哨

昨從雲中下及茲峯漸低舉首忽驚眩猶與青冥齊下臨萬
仞淵不測菴壺樓巘屹勢如削眇然窮端倪孤城倚在南大
江來自西時平一夫守日落羣鳥啼雖無崕峒劍意氣凌虹
蜺

沙箕凹

翳余初作西南游石坡犖确生煩憂八年宦跡遍睽詔登陟
岡嶺同平疇普安州路更險絕千峰萬壑森戈矛逶迤鳥道
入荒寨雁厂凹凸深劬膠出門羲御朗垂照倏忽雲氣蒸山
頭上山入雲雲不見纖纖細雨飛松楸普陌營邊溪澗汨羅
場坪昨風颭颭澗窮坡斷徑茅塞陡從人面開巖幽上緣無

梯之峭壁下臨無底之靈湫竹與繫繩繩而上空中倒挂如
猿猴倉卒一擲輒千仞衆力猛奮爭喧呌矧逢連陰窄磴滑
僕從策馬蹄難留一峯纔盡一峯盡羣山匍匐見孫儔造嶺
肌骨覺輕舉大千世界真蜉蝣晶瑩寶氣看洩露會貢三品
隨琳瑯出歸來心魂尚冲惕此身夢墮崑崙邱

貢象行

滲液神漿滿銀甕雕題繡面爭來貢已見黃麟出九真時看
白鹿游深洞南掌國處南溟濱自昔羈縻歸鎮控方物特降
瑤光精輪年一作天家供聞說岷山稱獸雄亦有蒼梧代
人種執燧曾奔組練師脫牙或備簪纓用不然蠢然塊然物
只與神獅作搏弄如何伊水別珍奇更羨荆陽看解纜朝
廷郊廟盛儀典立仗端門陪侍從浴處常翻百頃波秦時每

列十官俸九夷八蠻驚壯觀兜離齊獻昇平頌矧今新自遐
荒來不事周澄索兵衆野性初嘗白國禾肥軀底繫青絲鞋
短袖奚奴一一隨高冠貢使雙雙送此日欣留華嶺蹤他時
那戀龍江夢清秋空發昆明池漸由黔楚過商宋長鼻欲捲
太行雲剛蹄好踏滹沱凍順承門外象房深百年老物羣相
共食料寧須論後先朝儀實自關輕重遠人來格喜 天
顏異獸爭輪光 聖統上方 錫宴歌九功舞向 金階
競喧闐我 皇德盛尤冲虛旅葵一冊殷勤誦

五嶽真形圖

金壁瑞降陶堯延玉版圖畫地形重華協帝銀甕出河清
五老呈其精靈威丈人覲文命素書昭灼傳洞庭從來元德
契真宰奇蹤幻蹟超千齡異哉五方峙五岳終古屹立常青

立於象外別傳象奧更孕乾坤靈維岳布澤宣萬物崔
上應五緯星尊視三公俯四瀆天關靜鎮坤軸寧有跨蓮
峯據掌跡左登日觀聽雞鳴前登視融後陽曲中間申甫含
菁英峯巒可數證可陟詎比杳渺游蓬瀛奈何方士逞譎詭欲
開爐冶模新型嶙峋石骨只皮相別有精氣相和凝如人魂
魄納軀殼爲物爲變堪依憑青龍掉尾元武伏白虎朱雀交
縱橫嵩高嶠鼎儼中立端然具體方且平上下反正各有象
一一纓載神祇名四維囊括尺幅內盪胸鬱鬱何崢嶸舉首
不用六齋戴鍾鑿又豈煩五丁服之永辟魍與魑山魃水魃
俱使令此圖此語誰意造怪誕不登岳瀆經似真非真易惶
惑愚公智叟均難明吾聞海外有五岳其名罔麗於八紘蒙
溟亦自擅封號彈丸促縮徒誇矜中原五載一巡狩樹以八

表周四溟未聞山神異胎息內景外象勞經營茲圖迢遞出
漢世抱朴所見寧足徵武皇本自乏仙骨始迷五利終文成
王母遠居極西國幾曾萬里鸞車停錦囊秘本誰目覩紫臺
瓊笈空熒熒如果作佩禦邪祟巫蠱之案何由興宮闈尚自
逢不若山林川澤何由清堪笑罔兩徒責影孰解橐籥通靈
局丈夫方寸具五岳勸君學道安其貞

抵京贈二三知己

時運銅山四
川水道進京

三年仙侶隔蓬萊地北天南幾湖洞政績未留莊驕邑車聲
還傍郭隗臺魂驚月峽下重過力負銅山萬里來堪笑征衣
緇已盡不關京洛有塵埃

聯上安南關

沐瀉銷雌草萋萋極目雄關萬丈梯兩郡咽喉歸控制

關馬大
理地雄

紫一天星斗接攀躋晚風漸瀝羊裘薄初月昏黃鳥道迷陟
盡坡陀尋夜宿僕夫沉倦馬頻嘶

楊林道中

溪橫畧約路通車傍海縈紆取徑斜萬里碧天初度雁千山
黃葉亂啼鴉場空熨戶犁新土水落漁舟貼淺沙憶憶江南
風景似幾回回首白雲涯

袁文典

字儀雅保山人乾隆二十一年舉人官廣西州學正有
陶村詩鈔

甲午人日薛三南招飲白鶴觀同人雅集予以事不
得與補和原韻並呈二首

老此離家客花前髮已絲開春逢七日滿座酒盈卮迭以賓

爲主因從友得師草堂何用寄先誦道衡詩

閒情輸野鶴世網亂如絲有酒思金谷無緣醉玉卮題春渠
奪錦殿陳我旋師媿續羣公賦頻催雨後詩

將出都門留別諸同人二首

殘夢千山亂浮雲萬里愁客中還送客病裏又驚秋書劍空
蕭瑟鴻魚久滯留京華豈不戀輸與故人游

客中秋思

遙夜家山潤高秋客夢賒重幃燈一點深巷月千家砧杵寒
孤兔書聲續斷鴉瀟瀟長不寐回首望京華

蔣業晉

字紹初號立庵長洲人乾隆二十一年舉人官漢陽府
同知有秦中吳廡楚游出塞歸田諸集

臯蘭城中書所見

金城尙武地何由集大賈
幕宿酒家樓朝趨達官府
府中開豪筵徵歌選妙舞
篋藏珠玉來腰纏十萬去
遂令邊關間而爲貨賄處
縱非竭民膏母乃盜天庾
大小習成風使財如糞土
樂戶爭纏頭戎行弛部伍
憑誰問主名多言恐觸怒

自平涼赴臯蘭憶戎馬所經地

我本役荷戈從軍志所尙
朝辭崆峒來暮出六盤上
兼程趨間道烽烟心震蕩
孤城有烏啼廢竈猶井狀
殺氣作悲風陣雲壓遠障
羸卒學挽強蹇驢驅轉餉
但見嬰孩拋那有雞犬放
是時日當午炎威變悽愴
少憩更宵征月高意稍曠
燐火隱郊墳車輪滯沙漲
天明經戰場形勢審背向
此地領孤軍失援蹶上將
養癰非朝夕小醜敢肆掠
赫赫禁旅集皇威

孰敢抗沙蟲爾何物邊庭藉懣創我欲作饒歌要使健兒唱
何處雨傾盆天河洗玉帳

除夕和東坡除夜澠州韻

窮荒憂患中忽忽年華送坡公謫儋耳富貴如春夢托志惟
歌詩風月悠吟弄緬惟古賢人瓣香意有共緊予出關來邊
事少闕空寄跡在龍沙抗懷比鸞鳳赴赴揚

皇威謬謬

仰國棟

調近日接福州府條奏
邊屯疾苦奉旨查辦

籌邊裕至計反覆陳疾痛庶幾沙漠

屯兵農各安種除夕動微吟且酌蒲萄甕

新灘書事

上灘之難如登天千夫力挽一綆懸下灘之險疾於箭奔波
直下逐流電行人到此心膽驚性命真比鴻毛輕灘邊最能
最能水手名少慣入水不利人生利人死昨客不戒沉厥舟誰歟
陵有最能行

援手心煩憂有人翻身却下手攫得錢刀撇波走走歸召黨
酒相賀日夕駕浪伺船過

讀陳龍川集

宋家南渡日不振中原恢復方需人龍川起修王霸畧天人
今古胸吐吞攬時度勢志開濟萬言書就排宸闥建都首貴
識王氣錢塘衰耗難圖存強兵富國自有本言言切要多開
陳九重得書赫然震盈廷交沮不得伸渡江歸來嗟落魄危
機密網遭何頻天鑒奇才脫奇禍一朝知遇膺殊恩惜哉遽
死不竟用空有遺集垂經綸後人展讀想節概欲泣神鬼驅
風雲智勇一世盡推倒開拓萬古何嶙峋憤時不雪君父恥
高談性命殊非真酌古數篇昭特識不徒筆力回千鈞堂堂
正正論兵法公得此意雄其文或云于時涉躁進或云罹禍

疎持身惟公才畧足用世細行不謹非無因積累爲功涵養
正有愧諸儒嘗自云古人立言不欺已陋儒訾議徒紛紛人
中之龍文中虎獨悲其過多蹇屯空堂風雨夜披卷作歌直
欲招忠魂

石馬槽歌

有序

荊州郡廨有石槽傳是漢壽亭侯飲馬器也咫尺深
廣雕鏤精緻歲久剝蝕中斷雨過積水其中牽馬就
飲輒驚躍不前王少林異其事賦詩見示卽用其韻
九天星精化作槽離虛震仰文週遭鯨僵雨過怒鬱碑蘚漬
日炙浮腥臊金戈鐵馬久刼化誰拔劍斷生蠶蛟當時侯稱
萬人敵有馬神駿追風颺臨陣斬將策盪決一鳴萬騎暗不
驕歸來洗刀更飲馬大江浩浩波滔滔荊州勢據上遊地華

夏震動威名高春秋大義志伸討躍馬直欲吞孫曹曹方避
銳孫躡後翺漢有恨何時消白衣陰謀赤兔蹶麥城驢磨長
哀號紫微紅輝躡雲去憑依天廐驚凡毛牽之不前就不飲
譬若叱咤千人逃視魏如鬼吳似犬凜凜聲氣猶蕭騷髯推
絕倫馬無匹槽亦附驥傳不祧君不見夔府八陣風雲護江
流怒激石不搖又不見神兵殺賊驅石馬戰罷流汗威靈昭
惟侯精誠塞天地風馳電掣靈旗飄神遊故土應呼吸騏驎
精爽如堪招我歌傳信非誌怪此槽永古枕臥荆江臯

北庭都護行

有序

承恩公奎將軍林資兼文武忠勇絕倫出爲北庭都
護蕃回畏懷期年而詔移烏里雅蘇臺將軍余抵
戍時已啟行數日敬慕之而未見也先於途次構成

七律四首至此知其政思其人復續七古五十餘韻
庶幾萬里外非慕勢百世下有聞風耳

南山有竹直不扶括羽鏃礪懷以須渥洼之馬龍爲徒星精
下降天閑儲人物絕類稟自殊濟時英傑生非虛惟公大將
行則儒忠信甲冑體用如火不能熱水不濡出險入險同坦
途往者滇海申天誅急槍怒馬千人呼譬若獨鷄推羣

鳥詩歌召虎平淮徐一人知已無雙譽遠移節鉞天山

隅輪臺四野黃雲徂長風捲沙雪片粗蕃羌射生飲酪酥每
惜游牧窺邊虞秋獮冬狩軍政符六鈞弓注金僕姑壯士一
一勇賈餘剛場霹靂聲連珠飛者走者殲且屠羣番驚竄如
繼驪烽臺絕鞞鼓不桴經營荒漠垂久圖耕屯悉力勞征輸
南接高昌北伊吾糗糧車乘隨時需遠近徵調難牽拘斟酌

多寡善因除公之叱咤風雲驅直入虎穴無趨超公之平易
陽和舒水清或恐無大魚一規定遠籌邊謨得虎子無大魚
俱定遠籌邊語期年
化治軍民蘇玉門關外春來初織織柳色雲中鋪龍城清霽
侔 皇都我來遠戍同集枯瞻望弗及空歛歔長城之倚廣
厦居先聲已浹人肌膚結綠青萍抱區區有懷欲吐難陳書
星雲垂象昭天衢叩鵲利見占豈誣文武爲憲詞非諛北庭
都護如公無吁嗟乎北庭都護如公無

嵩山古柏圖歌

有序

箕邨張墨岑名宗蒼未遇時遊嵩山太室見漢武所
封大將軍古柏高不逾三丈圍過之愛其鐵幹霜枝
老而彌茂作獨樹於巨幅攜歸出示吾祖先大夫繡
谷公恰值花甲初度卽以此稱祝事隔七十餘年畫

久失去余于戊午正月始捐金得之又值祖生之辰
懸之堂中悵然有觸因歌其書述其事焉

有山嵒巖不露影有樹輪囷莫與並枝頭蘊起通風雲堂上
高懸重爇鼎紀年應溯商周前問產乃在嵩陽嶺漢武雄風
百靈召柏亦特受將軍號根盤地軸結蚪形威懾山靈作虎
嘯蚍蜉欲撼任擲掄雨露難滋容兀冪嗤彼景山遠可遷豈
如太室長共眺張公健筆性好奇山中擬狀凌烟姿瀛海神
仙不可遇茂陵封禪猶存詞五岳胷中起方寸煙雲脫底蟠
蛟螭摹成巨幅攜吳市吾祖歸田締交始洪厓拍肩花甲周
出此稱觴祝蕃祉君不見武侯廟柏棲鸞鳳寇萊植柏比甘
棠我遊兩地欲摹寫婆娑樹下空徬徨眼前突見太古質靈
氣披拂天蒼涼此本久落他人手不借捐金爲我有含飴尚

憶孩提年展軸已當衰齒後祖硯追思涕自流儀容畫壁存
豈偶青蒼渲染不改色恍詔孫枝勿替守東風入戶庭梅開
春酒介壽辛盤堆欲誦清芬感今昔不覺悲喜圖中來張公
名早登 天府翰墨流傳照今古參天枝幹歲寒交贈與歸
年兩逢午肅贈丙午
歸值戊午嗚呼見樹彷彿仰嵩高對畫常教念吾祖
歸至邠州值春盡日見水流花放因憶亡弟升枚桃

花溪水圖多名流贈作悵然補題

春光淡沲繚翠濃邠州西土田家風茅屋依依幽澗裏落英
片片明霞中鳴禽格磔雞犬放此間疑與桃源通連朝風雨
情脉脉驛路飛花感今昔我家桃塢依綠水每對芳辰集佳
客餞春已卯歲重逢繡谷好風鶯嚦嚦用查初白先生謠集
交翠堂贈先祖句吹簫
仲氏氣若蘭欲繼觴詠開騷壇詩翁當日執牛耳鉅公名士

欣盤桓

歸愚宗伯前座芝芝少馬居次阮鵬郵太史李勉伯吳金晉趙升之陸耳山張策時沈文聲重二推汪大升沙斗初張崑南兄同庵俱與會有詩

雖

無韻事簪花續尚有清音古調彈

晁

風吹落花漾清沼酒酣

客起皆憑欄共言此會洵非偶前有西堂翁繼後一時槃敦

勝南皮再舉人文仰北斗摧殘棣萼秋風到病骨驚看玉樓

召桃源空望五雲邊

宗伯有桃源又在五雲邊隨句

之子吟魂應獨吊我征冉冉

未離秦豈有仙蹤可問津忽憶斯圖重有感慨如流水隔千

春對床舊約虛歸思觸景新詞追夙因水流花謝年年事每

到傷春憶此人

七月七日出嘉峪關

白晝嚴關閉黃雲大漠屯風光中外異征戍古今繁客去得

無淚生還望此門雙星天上合憶別幾消魂

送至都護移節伊江

惻惻羈臣別遙遙威令行漫言離廣廈猶得倚長城屈宋風
騷侶甘陳竹帛名相逢原不偶沙漠証三生

新柳

一見一回緣依依似故人烟光凝驛路別緒動江津我憶武
昌種遙憐玉塞春今希高士傳長觸歲華新

入函谷關

中州鎖鑰倚崔嵬獨客今朝去復迴九國師延憑此險一丸
泥閉仗誰才谷深天設金湯固關隘秋防畫角催何必聽雞
更懷古夕陽駐馬幾徘徊

秋風亭謁寇萊公祠

巴峽濤聲挾怒雷一官曾遣寇公來讖傳野渡橫舟句名震
邊陲掌鑰才私祭千年凝臘淚孤亭百尺當樓臺秋風古跡

留殘照不聽猿啼已可哀

途次西安和吳舍人竹嶼山長用阮亭喜吳漢槎入關韻送余出塞別後依韻却寄

風塵早嘆鬢成斑
况復倉皇賦出關
異地遠投身似雁
中天長望月如環
三春行見千屯雪
一曲休歌萬仞山
多謝素交珍重意
臨歧爲我祝生還

除夕抵家口號

入門鬚鬢共爭看
看得遂生還
膽尚寒
萬里歸期當歲盡
五年愁話到更闌
在家叔季欣無恙
垂老兒孫已覺單
安命豈教尤怨集
屠蘇傾盡且言歡

懷杜閣

吳宮花草接荒邱
東下姑蘇霸氣收
共仰平生懷一飯
突看

此屋報千秋側身天地蒼茫詠入座林嵐縹緲樓綠水名園
思樂否後先賢哲繼來遊

仰蘇樓

磨蝎居宮厄運宜枉留作相九重知家來岷水源頭遠筆現
華嚴法界奇王帶山門僧作鎮劒池巖壁
帝廣詩謂御製和韻
獨憐壯歲遨遊者茂苑蒼涼彼一時

思白堂

臺榭高支五架新風流刺史主兼賓翠娥影裏修堤日弦管
聲中播化人三逕香煙千載社雙橋花柳一家春却看醉白
堂前記魏國勲勞羨替身

袁授階邀陪王述菴錢竹汀暨諸君賞牡丹得和字
江村倚棹入煙蘿人物依稀晉永和春夢喚醒輕富貴玉堂

養望重巖阿當臆映日花能笑列幄疑香醉可歌
深色一叢來不易洛陽聞道尙干戈

時洛陽有
楚寇之警

降中謁武侯祠二十二韻

三顧君臣契千秋綱目編風雲一以會魚水共爭傳
帝胄流離日奸雄割據年志存炎漢業力闢半隅天
大計躬耕定三分國步邇扶危王佐託受命老臣專
敢惜南征苦寧辭北伐連攻心擒獲策揮涕出師篇
牛馬千山運龍蛇入陣懸夙興親校簿久駐雜屯田
蹇蹇孤忠瘁堂堂正統延草廬留遯跡畫像儼神
仙洒落真希有風流尙宛然英雄含涕淚詩老致
纏綿星隕天難問龍歸德自全伊周堪並駕管樂
有隨肩宇宙垂名重蠻荒遺愛堅我來拜祠下草長
映階前抱膝高岡上彈琴落照邊清風生古柏新
雨響流泉月旦餘題咏溪毛

供几筵空山興仰止歸路滿蒼州

徐作梅

字用和號鱸鄉吳江人乾隆二十一年舉人官盩厔知縣

南寺

縛筏沿流渡穩於巖上橋愛看山色好如遇故人招白塔閑
塵劫疎鐘散次寥黃楊雙樹古未易許摩霄

東坡詩松桂得千霄
今松桂絕無佛座前

黃楊二
松甚古

題二泖漁莊圖

騷客何年置釣磯蕭蕭黃葉半江飛春風騎馬長安去閑却
客簪掛夕暉

上苑看春憶故鄉頭銜那羨校書郎煙簑雨笠生涯好二泖

重尋舊日莊

一帶柳陰水閣寒
漁樵近局酒杯寬
雕菰飯滑蓴絲熟
四十鱸魚齊上竿

遠山點點翠如螺
秋水依然鴨綠波
何日南湖同泛棹
拍殘銅斗和高歌

陸惇宗

字望之號菑塘青浦人乾隆二十一年舉人官閩縣知縣有秀林草堂存稿

次和古檀遊細林山韻

積雨荒遊屐春光負十分
遽然來短杖暫爾撥重雲
暮靄如留客他山已待君

吾解維從驛裏

何時能促席嗔咳得頻聞

綠蒲荷

蘇東坡詩綠蒲生西塘

避風山莊形同馬乳蒲荷而無慘色正綠鮮嫩可愛西塘名可石密食

萬顆圓勻出大濛堆盤綠玉訝疑空未容慳客能攜種應與
桐君補錄功馬乳正嫌多孕子龍鬚失笑舊稱翁釀成查滓
先融盡味勝醍醐未易窮

曹錫寶

字鴻書號檢亭上海人乾隆二十二年進士官監察御

史贈左副都御史

清初山房詩話檢亭胸襟灑朗大 內廷隨巡侍直時有篇章流傳曰下及登
進士改庶常復山部曹遷爲侍御因見朝貴家人會縱不法劾之均無實據吏議請
革職 詔侍原之仍令留任及至嘉慶己未正月 上追念其慷慨敢言不愧諍臣
之職且其事亦非失實追贈副都御史并諡其子爲中書丞異數也君中歲後頗好
小學爾雅注疏校勘
再三詩亦不多作

出古北口

霜淨宿莽平風高邊馬壯我行出嚴關心目恣馳浪巖嶺爭
超突泉瀑互奔放仄逕容數騎萬雉森巨防巍然衆峰頂鏡

削出天匠是時夜將半落月排疊障屈曲窮攀躋直上凌空
曠出險復入險頃刻倏萬狀回首眺神京煙樹鬱相望歸途
更登陟壯觀簪微尚

早寒

策蹇凌霜坂風高木葉乾空山秋易老絕塞氣先寒肅肅車
徒靜迢迢鼓角殘幸依仙仗近行路敢云難

塞上

高嶺倚層穹寒生萬壑中驚沙常暗日衰草自生風霜落征
衣薄秋高塞馬雄揮鞭一長望煙樹正空濛

秋日塞上雜詠

雄關高並太清連終古風雲壯北燕山自朔庭環九域城聯
遼河控三邊收甄沙暖空榛莽飲馬泉清絕瘴煙 盛代卽

今虛斥堠秋光滿日覆平田

烏桓城下陣雲黃白馬關前月似霜百戰雄圖餘玉壘累朝
形勢固金湯天晴鐵騎排空見日落龍沙四望長惟有灤江
鳴咽水年年常自繞邊牆

李漱芳

字藝圃渠縣人乾隆二十二年進士官監察御史左遷
禮部主事

書趙恭毅升喬公世德冊後

重熙累洽景運隆星辰河嶽精氣充篤生偉人亮天功猗歟
尙溯恭毅公毘陵遙胄閎閎崇世濟其美樹德豐大賢紹緒
道積躬文章勲業孚宸衷旬宣兩浙旋奏功屏藩晉秩

開府雄體國經野昭公忠以此翊治邀酬庸仁心淪浹茅簷

通士林額手銜恩同組織千字光熊熊蒼生霖雨尺幅中孫
枝五世朝陽桐摘華挾操奎壁宮庠掌古榻懷祖翁公卿墨
寫烏絲融千秋清獻標家風世德世寶垂無窮

周嘉猷

字辰告號兩塍錢唐人乾隆二十二年進士官益都知
縣有兩塍詩草

由信州至江口

曉行發信州迤邐路逾百匝岸無青林連岡盡頑石解作阜
亦童昭蘇草難植混沌眉不書肩鳳掌誰劈茲邦富人文自
昔饒英碩地產既靈奇山容亦蘊藉如何乏清潤所見皆曠
礫菌蠢過客嘲蓄縮山靈怒伊余值屯蹇累載事行役往返
頻溯洄形模細測識賦象揣各殊肖物視須通雖未工雕搜

亦自巧搏埴或圓如米罔或方如射的或累如碁槃或駢如
早樾或如松皮皺或如龜兆坼或如馬振鬣或如鹿解脰或
孑孑如檣或泛泛如舶或積疊如堆或細碎如磔或如科頭
翁魁梧岸巾幘或如袒胛僧禿髻振鈴錫飛梁橫山腰有徑
不可陟鼓鼓棄水漣有恒六可擊怒猊渴飲河跛鼈倦伏磧
藤絡山果懸瀑挂秋瓜瀾波窅曰可春嚴研窟堪宅窪突肖
陰陽單複類揲劫邱背復有邱突兀露尻脊大山與小山吞
吐互齡齡累累斷復連縷縷明且析卓立畫地雖競舉去天
尺向背詭狀分遠近瑰姿易斷削豈鬼工搏掄費神力幻視
巧呈形疏觀細俾色潤滑凝流脂枯焦噬乾腊日炙蒼顏頰
浪漬獷質黑映樹微含青宿露半縈白剝落雜黛赭漏瀾間
黝赤翡翠毛留斑鸚鵡眼舒碧披莎虎竊毛俯水魚喫墨千

形既瑰異五色復輝施瞥見詫童頑久玩欣煒燼大巧類若
愚至美轉無飾媧氏煉所遺秦皇驅不得自古常嶙峋于今
頗戕賊開鑄勁骨蘇迸落大聲騁利刀劖蹲踞巨斧斫怒特
披刷去鱗皴推蔽絕領額豈唯損石容亦恐傷地脈匠石資
或饒靈斯怒恐赫寄語此邦人應爲山川惜

彭元瑞

字肇仍號雲楣南昌人乾隆二十二年進士官至工部
尚書贈太子太保協辦大學士諡文勤

蒲褐山房詩話文勤少年敏慧早直西清應奉文字婉麗清新往往出人意表
所進無不被蒙獎賞者而恭跋御製全韻詩乃集千字文爲之又撰
清宮前燈詞聯體尤佳上賜以貂裘端視中外策之故
恩辭終不替嘗補宋人四六卷更爲藝林傳補

雪

上元節後三日雪千山萬山人影絕抱春出門門已封直空

無煙甌空設去年歲事失豐穰一顆一粒無蓋藏富家困窘
多紅朽相持遏糴祈天荒飢兒張口向爺哭人家炊米勝糜
肉爺泣語兒兒莫啼縣官方發常平粟

題橋亭卜卦硯

其修九寸博半尺厚不及寸土花蝕云是朝天橋上亭賣卜
簾前淚和墨一聲白雁江南飛三日潮頭招不得更無趙家
半塊土惟有先王一片石崖山風雨已十年臣心不轉如石
堅從容就義誠非易疊山後死文山先百年橋崩硯始出四
百年來傳勿失太平太守好事者對客摩挲恒永日畱將玉
帶生並垂石不能言觀者悲當年病餓憫忠寺壁間太息曹
娥碑

杏花十二韻

三
簷外廉纖達曉零如傳芳意編郊垌明朝隱約春堪賣深巷
依稀唱未停宿潤飽霑將坵疇霽光微烘乍含馨料量已是
繁花候想像初逢昨夢醒燕子飛時春漠漠牧童指處溼冥
冥繞迴曲徑簾猶押響徹層樓戶半扃陌上泥沾高下屐攢
頭香過短長亭出牆欲遣關難住隔堰來看思未寧搓絮垂
楊同爛熳抽芽新草共葱青曾從范蠡湖中見憶向慈恩塔
畔經送酩風光知近節催耕消息到遙町誰憐騎馬臨安客
暮雨瀟瀟不忍聽

湖海詩傳卷二十一

青浦王 昶德甫輯

蔣士銓

字心餘號茗生鉛山人乾隆二十二年進士官編修有

忠雅堂集

蒲褐山房詩話皆生諸體皆工然古詩勝於近體七古又勝於五古蒼蒼莽莽不主故常正如昆陽夜戰雷雨交作又如洞庭君吹笛海立雲垂信足以開拓萬古之心胸推倒一時之豪傑也君長身玉立眉目朗然素衣青襟落落落落襟懷坦坦忠孝節烈事無長歎以紀之妻孥激楚使人雪涕風知音律意所未盡放而為院水有芝龕香祖謝世尤稱之後香樹向書金檣門總憲先後督學西江皆待以國士故生平論法不衰裴文達公曰修營以君與彭司空元瑞並薦上前故御製詩有江西兩名士之目然司空久直西清游登鼎軸而君卒以編修終非所謂數奇者耶乾隆戊申余以布政使南昌而君已下世矣既展其墓復過所居菴園攬小鷗波草堂秋竹山房釀春花樹青珊砌館邀魚步茶烟與國月簷晚晴隔芳潤齋綠隱樓諸勝為之撫然

望江上諸山

嵐開萬象出徑豁兩峰對一磴穿青雲曲折異晴晦境幽寡

人迹疎磬出鳥背僧樓如點螺古佛觀自在遙知深塢中有
客對飛瀨誰聞廣長舌泉聲發虛籟名山念所歷佳游與心
會發興可忘言思尋陶謝輩

龍洞山

拔地立城郭壁面四圍俯地底開龍洞山根蓄風雨傾灑有
餘潤卓犖無寸土石裂草木出風過丹黃舞橫嶺簇細竇亂
雅奪門戶龍居對開豁東洞側破釜避秦竈火絕陽和至今
貯西洞受朝曦貫壁徑可取天眼一斜穿暗漏每奔注誰留
面壁相灌頂生潑乳半規透旁隙僧引前列炬打頭識磽确
漬衣驗沮洳入穴遁蛟虺脫身全鳥鼠兩崖兩扉抱一峰一
屏豎裴回壽聖院摩崖念初祖樵歸客始炊烟起鴿微怖深
杯吸靈怪倒影怯蛇虎茲山未云深昔至人已古馬蹄遠莫

寒出谷日猶午

師竹居待雪用禁體分得竹字

無衣愛冬日不雪意常足擁裘把深杯祈之恐不速是物關
豐歉老農有同欲寧忍三冬寒竊喜二麥熟禁體學歐九失
職罪滕六三光會元枵片晷沈北陸當午窮陰凝萬象爲歛
翦敢發天地房百蟄方退伏先聲奪壯色雞狗皆蝟縮資清
質已成欲泄故含蓄輕發虞易盡遲見難遽迴抱潔懼滯溜
積虛耻炫鬻落地怯手援全形怕熱觸既墮那得收一散未
可束不嫌出納吝深恐消融酷暫免螟螣死終令土膏沃枯
林出勁氣勢欲敵挫戮可憐松柏心持此報顛顛吾儕手腳
僵延佇豁雙目熱中賴祓除缺陷需掩覆豈惟庭宇淨且解
塵囂俗那知龍公手別自具杼袖謂爾劉伶飲愧彼孫康讀

貧天爲歡娛玩物其徵逐不知窮檐侶輟豚死相續夜寢飽
霜霰朝餐乏饘粥杭稻走吳越兒女易斗粟上厓君相憂
官吏相踣躅空麥殺其蝗仰望勢誠蹙以茲三尺雪救彼萬
家哭汝有鄒枚才無異凶年玉焉得浪拋撒佐爾饕餮酒肉我
聞龍公言意態頓拳局相視薄風騷便欲偃旗纛願傾杯與
炙天地變黍稷更取筆共紙隨風化衮褥覆彼溝中瘠一果
道旁腹人心有專禍天意無偏屬火急布六花以遂甌窶視

竹活

移竹養正齋舊葉盡黃脫皆云非其時栽植同剪制我過無
術補對之惓惓但淹忽閱兩旬一一傍檐活笋芽抽嫩鞭筠
枋長新籜生機未遽戕死氣不敢奪土力本未潤根脈遂如
渴疎雨夜滴瀝滋溉乃旁達僵者漸昭蘇鬱者漸開豁如魚

困圍圍少定去潑刺天地所不凋華美孰能遏歸雲與千霄
百尺起豪末明年陰叢叢勿懼風偃拔斷續而待醅俗論從
可抹貪天以爲功榮悴我其幹

乞羅兩峰畫屏

書學書家書畫學畫家畫束縛規矩中所守亦已隘兩峰欽
崎人資稟軼流輩展足裂地維放手破天械碧眼然溫犀萬
鬼失狡猾神光掣瞳人下透轉輪界豈但胡中丞坐照入幽
昧遊戲弄不律奇趣生象外細審乃逼真驟覽疑涉怪威攝
天神裝媚曳水仙佩龍受金剛降鵠下老佛拜誰爲羅漢參
各稟菩薩戒花殊含玉葩樹古發新態或貌地獄相面目來
瑣碎陰風聚豪端死氣出紙背人理彼旣絕厲魄君弗貸不
知布算勞但覺運斤快藝苑撒畦町墨林除障礙昔師冬心

叟弟子存法派老蓮寫人物奇古爲俊邁草法寫衣裳楷法寫眉黛而君所嗜殊高逸頗相類我每見君作有見無不愛如玩索靖碑寢食俱可廢乞君繪屏風求益同買菜欲寶君子貽長與古人對君勿嫌幅多真手僵不壞

愍忠寺觀傳雲畫觀世音三十二應像

虛堂湧現人天身三十二相何紛紜聲聞辟支毘沙門梵王帝釋天將軍宰官居士長者倫比邱優婆男女羣天龍夜叉人非人修羅摩睺金剛神珠眉火目莊嚴尊魁肩謁鼻醜怪均芙蓉頰輔丹砂屑黃金臂指藤蘿筋或大歡喜或怒瞋施飄然冕纓旒紳笏杖劒塵戈鉞鐔一一妝束離六塵明霞綵霧相鮮新喜氣熱視衆欲親兇威乍矚皆退奔誰其畫者爲傳雲十指爲筆掌擦皴爪甲畫剔蠶螺紋雲也偏羈性莫馴

窮老不作王侯賓使酒嫚罵直氣伸忽然醉弄松煙盆狂叫
拍抹獅王蹲思議遍指諸天魂大笑捨之祇陀園噴灑墨雨
飛慈雲妙香四壁浮氤氲名觀世音何緣因耳根第一文殊
云云何解脫萬劫輪稱名普救如其仁寶珠璽珞奚足珍衆
生卽佛無合分青蓮九品花葉根三十二相孰假真現身說
法空勤勤離慾者誰菩薩顰髮汝多事慈容嗔

三峽澗

參天萬木排前灣蚴蟉怒攫山風寒是松非松走相覓腳底
霹靂生奇觀亂石夾水水勢破觸罅迸出雲千團積鐵輪囷
塞陰壑醜怪萬變窮劖刊立者堅壁疊者壘以凹作穴凸作
闕本是神鬼所施設反如人力成雕鐫鈎連盤踞不可狀各
出猛力迴奔澗盤旋隨勢作緩急泚然斗落空潭間其餘縣

溜樹根下樹緣溜浸渾難乾飛梁坐久駭畧定毛髮凜冽胸
懷寬雷聲入聽視轉失決眦飛鳥無停翰耳聾目眩細搜剔
玉淵大字若苔斑瞿塘灘湏苦未識對此不覺雙眉攢我聞
廬山之水盡奇絕半倚削壁成驚湍何當走地獨狡獪不與
挂練爭騰翻忽思後夜踏明月石髓滿吸松花餐解衣坐石
弄長笛夢魂浸入玻璃盤前山有約客欲去風雨一霎飛林
端

開先瀑布

瀑布之水源何來劃然下裂長峰開下士目駭自天落絕頂
乃有千盤迴青山斷俠聳雙劍元氣直瀉巖頭摧飛流已出
不肯下一綫中折分瀠洞隱現數折蓄精銳失勢一落如奔
雷跳波亂擊潭水立怪物潛伏寧髻頤音聲頃刻遂千變萬

馬赴敵金輦催天光半壁照空谷此地萬古無陰霾餘骸積
雪挂千仞山中猿鶴猶驚猜銀花下散布水臺混沌鑿破山
根限四壁皆刻大勞窠大字洗不盡鐵畫滿地鐫青苔太白已
往老坡死我輩且乏徐凝才惡詩走筆不敢寫山亭煮汲燒
松釵來朝竹杖青芒屨淩風踏碎烟雲堆飛泉三疊絕倚傍
坐觀一洗塵氛懷

題天全楊藏用遺集

嗚呼楊公將門子外藩千載官世世裂土何堪及身止昔者
公年五十二手扶老父辭鄉里全家來飲西江水市人不識
宜慰使謂公西蜀蠻夷耳我聞天全古荒服外控魚通三十
六子子孫孫飛食肉朝廷倚彼爲爪牙楊氏高氏分符竹高
司始陽楊弼門婚媾累世相仇恩怪哉楊氏生公如虎賁高

司性螯鯨鯢吞心欲楊氏無兒孫當年木坪蠻司死邊堡公
翁定襲成都道公守硯門年正少何來沃日瓦寺軍高司虎
視將爲暴繼卒告公公劇飲燔羊饗吏銀鐙繞三日敵來公
已去竈下惟留白頭嫗鼓聲一發伏兵埽蠻兒肉血飛秋草
男兒如是亦快意頭白南還傷閑置低頭但詠卷中詩絕口
不談邊外事聞公善射立馬背左右開弓不挽轡兵書老去
厭三復袖箭生平只一試自言昔與木坪兒半夜微酣尙能
記空堂燭滅電一掣箭出中光光已逝舉燭索箭不可得箭
著東牖血點地少卻幾爲高氏刺嗟乎公生丁巳卒丁巳我
歸猶及交公弟公側室子犀垂涕道公往督挽西藏糧蠻山
醜樹森刀鎗毒霧著人人立僵得公調護人命長無人不愛
硯門陽篋中遺詩尙萬紙公之功名文字裏六十年來奇男

子南昌占籍公其始

乞酒戲呈監試明惺菴紀心齋兩侍御

斗柄插屋百慮收酒星退舍空尊愁遣秋愛覓犀首飲泛月
或喚秦青謠鏤閣靜夜對官燭良友促坐思觥籌豈無法酒
醴百斛但恐渴鏡皆雙昨當官禁令一夫守愚公併力移糟
邱龍門似下萬鈞開涓滴不作迴瀾流平生文字抵麴蘖豈
必沈湎爲拍浮枯腸芒角藉少潤消渴未欲尋茶甌買菜猶
希圃師益貸米許向監河求身冠繡服兩儒者閭內司命職
有山米鹽瑣細仗家督江海灌溉資陽侯麴生可否召白墮
從事何必拘青州調羹例得取梁醪多則益善淮陰謀諸君
垂涎有同嗜發顏三爵看油油荷插寧如伶便座滅燭或者
髡還留兩公監酒亦所願童叟請罰號呶儔不然破觚毀酒

具白簡彈劾公其休

題表忠觀碑後

不肯閉門作天子願作開門節度使西湖之水豈可填有國
百年吾足矣妖賊紛紛盜赤符公言赫赫傳青史三世四王
七十年功名五代相終始嗚呼仙芝漢宏一亂民黃巢嗜殺
終滅身可憐不識忠孝字高駢董昌皆重臣八州父老免塗
炭九死包容頒鐵券由來信誓出殊恩敢使兒孫懼國憲雍
熙納地倖免誅南渡陰還土一隅仁人再世且享國佐兵好
殺何其愚勸忠異代推清獻墳廟無虞還立觀特筆誰如蘇
子瞻雄文壓倒羅昭諫

歐雷山副將畫像歌

須眉颯爽風雲起身是仙人歐冶子霸陵不失故將軍夾漈

爭呼老居士將軍十九身從戎雙手齊開兩石弓雄心夜拓
沈沙戟猛氣朝馳汗血馳昆舍那洋開赤嵌橫海樓船飛羽
箭香炷三傳鹿耳更礁沙七轉鯤身纔將軍拜爵左先鋒殺
賊曾推第一功龍頑無聲鳴母死姓名勒石臺灣東專城列
戟牙旗展閩越營門自移轉獅鎧榮披上將衣油幢遠挂東
甌象烽火全消息戰塵投壺日醉太平春老兵忽作探丸盜
諸將皆爲賜珥人角巾一旦歸田里沽酒騎驢經二紀山中
每伴赤松遊橋上誰尋黃石履俾肉潛生氣不衰陰符親授
兩男兒孟公久註翹關籍仲氏頻褰繡槩帷七十老翁誇翼
鏢形容未寫麒麟閣一丈霜縑九尺身封侯骨相輪奐鄂五
十年前壯士顏丹青老向畫圖間百回把酒行軍令幾度挑
燈看箭瘢海南此日貔貅往不知誰縛降王長王師豈必待

廉頗名將由來多李廣仙翁壽骨健兒身仍是當年介冑臣
紅衣不把青溪釣世上英雄信有真

童二樹 鈺 畫梅詩

童君畫梅千萬樹白寫槎枒老蒼句花開古雪未消時香入
空山不知處梅花開落天地中出土那識春與冬羲和制歷
造歲月始覺萬卉難爲同著花結實偶然爾頌之惜之皆可
鄙孤芳或受雨露生羣豔空隨雪霜死童君能詩方九齡寺
壁一掃太守驚腕中天授隸草法用以寫梅奇骨撐我不識
君見君畫每對梅花身下拜行根竊懼地輪斜放幹真愁天
宇隘想君畫梅身作梅十指屈鐵梅苞胎驅魂附筆夢怒發
使氣入墨枝幹開圈花破蕊等飛白人與梅花鬪標格神慳
鬼奪一青衿去作諸侯老賓客

天台萬年藤杖歌謝陳象臣

夢說

觀察

仙官來往天台裏父老趨迎男婦喜居民捧輿度岑岑絳節
桃花相逕遇老藤蟠屈寒蛟僵萬古甲子不可量始爲統指
柔漸成百鍊剛脫身未肯附松柏定性久已忘冰霜歛肉入
皮筋入骨混沌花葉皆收藏山鬼驚看避神物飛仙偶踏行
石梁不知歲月冉冉過但覺年命迢迢長仙官遊金庭碧林
瑤草香不覓胡麻飯不攜采藥僅長揖天姥云吾友有母壽
且康願乞此藤作鳩杖庶幾筋力如藤強天姥顧之笑美哉
公意厚益臧神人斤斧乃一舉截藤九尺直以方仙官拜賜
去洞天間寂山蒼茫攜藤歸遺小人母堂北老親開笑口仙
人之貽我則有敢不拜嘉同稽首童孫代杖可釋肩看雲數
鴈藤周旋擲空莫化老龍去倚壁不擾慈烏眠老安少懷見

公志忠信作杖扶危顛公身挺勁比藤健野狐敢近天龍禪
此藤托根本福地由公歸我數則然摩挲後世見手澤母壽
願與藤齊年

題文信國遺像

遺世獨立公之容大節不奪公之忠天已厭宋猶生公一代
正氣持其終小人紛紛作丞輔公不見用且歌舞朝廷相公
國已忘六尺之孤是何主出入萬死身提戈天意不屬當奈
何十載幽囚就柴市黔魄且欲收山河節義文章皆可考狀
元宰相如公少山中誰救六陵移地下真慚一身了亂亡無
補心可憐天以臣節煩公肩不然狗彘草間活借口順運謀
身全俎豆忠貞遂公志嶺上梅花公再世鄉人誰復繼前賢
一拜須眉一流涕

江孝子詩

右臂之肉不可療母左臂之肉不可療父兒身親身親已亡
血肉之軀亦何補朝視母墳夕憑父棺茅堂淒淒臘日苦寒
嘻嘻出出妖鳥語風卷檐茅棺莫舉孝子拜火火弗許飛廉
揚揚祝融怒抽刀斷指驚祝融神急止火神反風父棺不動
孝子死老翁叫孫孝子起翁欲告人兒止止翁拾斷指裹以
紙丹徒舍人啓衾視右手垂垂缺小指兩臂創痕况若此把
筆傳之淚如水江家五世居丹徒兒名延祚未讀書生年二
十但知父與母不知肢體爲我有呼爲孝子兒不受倘以爲
言兒卻走父曰懷德祖曰珩閩史書之存姓名事在壬辰十
二月孝子不願 朝廷旌

吳節母

三十五未亡人五十五完節身世德之家夫竟死十一齡兒
作孤子兒讀書母忍飢飢腸文字五千卷薺甘荼苦皆不知
猶記蘭闥笄總時左圖右史娘所樂祿命五行貌五官不似
娘身得天薄兒不能娶母煢煢神官夜半來夢中我爾曾祖
中書公帝嘉爾節爾可終母覺語兒含笑逝成佛生天皆有
自母節當旌格于例兩氏姓名纔可誌生張嫁吳居丹陽夫
死子俊登縣庠乾隆戊寅年未亡人乃亡

趙忠毅公鐵如意歌

臣掌選司陳四害臣掌都堂論四凶澄清廊廟是已志豈肯
係頭魏進忠呼臣元凶具十罪皇天后土知臣衷坐賊遣戍
心無悶不見逆案死且恨平生烈性百鍊剛隻手焉能挽天
運烏金如意翦黑雲誰與鑄者張鼇春七星五嶽拱八卦圖

書映帶雲雷文其銘二十有六字堅重其爲君子器廉而不
刺鉤無饑舞歌勿折臣之志身圓頸方尺半長上有葵花向
太陽鴈門相伴死宜殉幸未附棺埋北邙衷中恨少司農笏
虛說三君同兀兀莫向宣州弔老兵此卽錚錚忠毅骨

輓楊鐸仲二首

從軍奪稍老親知小范當年是虎兒聚米熟諳蠻地險談兵
遙念漏天師莫年烈士心原壯失意騷人字本奇勲業功名
俱寂寞弓衣留得可憐詩

腹痛腸真似轉輪荒園十笏賸斜曛頻驚老友都爲鬼重過
良辰不見君倚壁杖猶支破牖藏詩瓢已挂孤墳河梁一別
成千古石馬風寒未忍聞

一經齋小集送王德甫之山左同金梅門錢蘊石二

先生汪康古孝廉限經字齋字二首

感遇傷離雜醉醒
摩空猶是未梳翎
已成鸞鳳仍飄泊
自古風雲有晦冥
旅食深知貧與病
才名虛指客爲星
離華山畔尋君路
夢裏還應一再經

明湖秋柳至今佳
打疊蜻蛉泛水涯
歷下山川名土地
江南烟月旅人懷
文章事大期千古
主客詩成憶小齋
賦到登樓堪隕涕
壯心容易付沈埋

除日喜吳葆圃至歲朝送其赴永康州任二首

閒到梅花又見君
三時消息感離羣
語如春逗迎年鼓
官似風迴過嶺雲
臘韡對嘗分歲飲
香衾同憶蚤朝熏
此身更比桃符舊
羞翦寒燈一論文

冰銜領到第三州
風雪依然一敝裘
重見邊人迎父母
數勞

蠻長盼君侯天涯舊雨誰推轂身外浮雲合倚樓何日宦成
歸井里兩家茅屋傍花洲

夢中訪竇文貽都督有作篇成而醒

十丈旌旗八面營屯田都與戍人耕陣雲風偃全軍肅沙磧
天圍一掌平萬馬不嘶春縱牧九邊無警夜論兵兜鍪挂壁
銜卮酒猶是當時魯雨生

送王德甫給假歸葬二首

幾年八座捧安輿馨膳南陔奉起居請息許歸于定國臨歧
同祖路溫舒春暉正永仍將母官舫無多半載書笑指漁莊
烟水闊九峯青又到吾廬

河山遮護漆燈明封樹赫黃禮竝成天以佳城藏長者人誇
孝子是名卿圖書雞犬偕安吉父老桑麻說太平暇日花前

展棋局定知談笑一論兵

童墨林秀才攜畫梅相訪不值書以奉酬

偶乘藍筴探春光底事歸來鼻觀香尋到龍山花不見那知
疎影壓書堂

平生愛畫更憐才未見幽人卻見梅料想黃樓吹笛夜羽衣

曾伴鶴飛來

君歸自彭城故云

彭紹升

字允初號尺木長洲人乾隆二十一年進士有觀河集

蒲獨山房詩話允初爲芝蔴先生第四子家世清華鍾寶和璧而自雋育官卽辭
職仕歸而專心自紫香燈禪板幾似黃面頭陀所著居士等集使讀者試有染那
安養之美支那厭迹無以通之然文章流別亦能識其源委古文宗法震川而詩
亦克承其家學晚年恒化石君司農稱其已登灌頂位昔陳思嘗主述須白傳亦
歸兜率以今証
古或不謬也

揮手

揮手謝人世蕭然此閉關有懷長傍佛無夢不依山竹送牆
頭翠苔侵戶齒斑間雲如有約朝往莫來還

謁二姜先生祠

飄零鴈羽共殘生諫草空傳千載名九死流離君父痛一生
患難弟兄情萊陽歸去餘荒戍吳國淹留賸老兵虎阜山頭
薦蘋藻流風應共首陽清

酬曹履聞見贈次韻

物外論心契獨真相依桂館絕喧塵攜琴入海他年約蠟屐
盟山未了因雲淨寒潭才見月雪消梅萼早生春南園此夕
勞相憶太息年華一度新

過法雲菴贈果堂上人

閒行郭外路彎彎寂歷菴居破蘇斑古殿有鐙陪佛影團蒲

無夢落人間茶烟斷處還留客梵冊開時自掩關可愛新吟才脫口深林幽澗寫潺湲

吳寬

字非匏號淇芍歙縣人乾隆二十二年名試賜舉人官內閣中書

嚴江舟中

碧嶂重重合清江曲曲通幾家紅樹雨一棹綠蘋風客路驚凋鬢鄉心感斷蓬薄衾愁永夜莫遣酒瓶空

孫永清

字宏圖號春臺無錫人乾隆二十四年舉人官至廣西巡撫有寶嚴堂詩鈔

度風簾嶺至龍井

隔嶺聞風篁淒韻雜飛溜緣巖將百轉仄徑迴疎秀遙睇白
雲封近見紅日漏登頓蒙翳深夾林華鬢覆細泉繞其根澄
泓媚石蟄巖花共鮮新古翠紛縹繡空色妙不延神景愜無
舊想像東坡翁高人此締構去住本無家風流不可復莫辨
虎溪蹤誰識歸隱實我亦蓮社徒欲去戀孤岫

自芙蓉邨度丹芳嶺至能仁寺宿

鴈山出天構乍到絕思慮篴輿信幽討蓉川渺東注邨烟抱
虛谷石瀨媚芳渡巖紆細路通峽轉鳴淙互扶攜藉僮僕偃
僂接跟腠問途陟百盤直上不數步峻嶒到絕頂木杪怯還
顧蒼蒼谷內峰林立涌雲霧浩濤淩滄洲莽蒼截雲路氣象
生萬千目胸已非故倏覺嵐氣濃晝晦浩傾靈一徑入琳宮
松杉夾衢樹險絕坦夷得至理

生慕

欲再登孤嶼湖惡不得到遂至館頭和韻

江上變氣候金風被蘭蓂露晞偶遇中川營琳宇仙舟幸
同攜曉吹韻笳鼓瀾瀾沉石華離離出竹祖是時迴怒潮榜
人暗無語聲喧千石鐘勢極萬鈞弩超越匪尺尋端倪辨銖
黍方蓬失罡飈何必弱水阻翻憶前度來目成渺何所心逐
虛舟游蹟謝短筇挂脩綫果安窮噫氣空爾怒稍忻卽次安
已慰登陟苦寄謝海上鷗忘機久予取

晚泊葉青洲

殘雨忽已霽初月升林薄森森水風生濛濛霧花落不見葉
青洲但向烟中泊何處下漁燈空江起孤鶴

早發中邱驛至臨洛關

宿雨生夜涼客夢失朝爽振策出郊坰趁途意先往遐矚徑
多岐近陟渚無枉潦收黿鼉宜沙淨鵝鴨長八月正逢穫村
村快豐穰登場多黍稌滌圃富栗橡樂業徵民風熙皞有真
象嗟予遠行邁郵節勞執掌遊目得所欣愜心在幽賞卽次
稍延迴隔水月初上

沙哨道中遇雨

山程忽陰霾疾行出雲背卻立看巒峩崿上霧霏蛟龍揚
其鬣不避魑與魅雲海互翻波玉山忽破碎少滅無定形萬
象爭顯晦我生性豪豁觸景窮變態認此心諸佛彌覺胸宇
大須臾昏霧收豁然見蒼靄斜陽在松頂隱隱明新翠循途
下危坡適館趁芳瀨回首望雲巖真來白雲外

晚渡鄱陽湖放歌三首孫谷

九江之水來峨岷奔流直欲無東瀛鄱陽千里迺一束勢吸
雲夢吞揚荆竭來八月露高浪蒲帆十幅輕鷗輕柁樓一笑
旗腳轉如箭脫手弓聲驚是日海雨開晚晴湖風乍息湖水
平纖雲羅羅月額細斷霞片片虹腰橫韉紋萬頃皺滑笏玉
筍千疊環圍屏大孤小孤隔水見儼臨玉鏡窺尹邢烟鬟霧
鬢各嫵媚欲乘蟾蜍相目成中流恍聽女媧曲仙樂一奏銷
流鈴江斐招邀耀翠羽湘娥婀娜揚華旌陰潭大澤足神怪
長鯨鼓鬣龍睽精黃神越章佩左右前驅所導孰敢撓飄然
身已渡弱海如超鶴背風泠泠我時歌嘯倚宿醒遶遶蝶夢
如乍醒平生浪蹟墮人海十年漂泊真浮萍眼前好景且莫
負尊中美酒宜同傾明朝好節西江上又看圓彩生滄溟時

峽山寺和翁學使方綱

粵山山石多峻峭綠江一一嘉名徵綿延千里到三峽勢如
萬馬奔岡陵峽中勝處放孤剎飛來遺蹟古所稱入門乍聞
鐘杳杳到門已覺風泠泠書臺經石徒耳食祇餘往蹟鼯鼯
騰欲尋石磴訪石洞遠望絕頂寒烟凝我奮雙足躡屐登亭
午雲氣如金蒸誰與脇息誰撫膺百磴一氣我獨能絕叫衆
侶衆不鷹細逕爭與猿猱升天風縹緲不可憑但見展底盤
蒼鷹我生箕漢有微尚十年遊蹟差可矜東登日觀擘初旭
西陟玉女扳枯藤雁湖濯足雲鬟歷石梁弄瀑冰凌競豈知
南行訪廬岳蹟所未到興已增竟欲從茲採靈籙探得仙藥
誇儕朋六根塵界恨未拔短髮搔首徒鬢髻草亭延佇月已
昇歸路犖确憑攤僧興餘還和壁間韻欲寫細字煩禪燈

過德水宿西方菴

德水西郊路宵行生暗涼城依綠楊岸風遞白蓮香稍覺開
平野還欣接上方勞勞倦于役信宿借禪牀

新湖

積雨綠巖岫空林明翠微人家湖口遠魚罾晚來稀獨向烟
中立翛然風滿衣仙源不可問雲徑是耶非

峽山飛來寺

名山絕頂啓禪扉英俊當年此息機到地松風飄梵唄有時
花雨落人衣青瑤澹漣流銀漢紫竹陰森眇翠微帝子綠雲
何處所讀書臺畔草芳菲

和若洲秋日遣懷見寄之作

風雨頻宵令節過山城落葉漸辭柯秋聲暗挾江濤壯雲氣

遙連海色多隔嶺軍書勞騁望故人問訊悵嗟跼佇聽露布
傳閩嶠萬里金鏡奏雅歌

送張牧堂

珠江春漲遠連天送客津亭雨似烟向晚西風吹更緊離心
先上九江船

江半坡寒食

棠梨花發野鷺啼寒食年年苦憶歸今日蠻江聽錫鼓落紅
如雨上征衣

張遠覽

字偉瞻西華人乾隆二十四年舉人官鎮遠知縣

蒲褐山房詩話偉瞻沈靜誠懇望而知爲茶人論士鄉試出朱石君先生門下垂
三十餘年始爲縣令得黔之鎮遠地處衝要且倚軍興之際遂乞老以歸所居在
西華城南有水田一頃善木書二三千卷僑門人王耕畝講習
以終老不喜爲詩學古文得震川一體予已采入湖海文傳中

讀漢書

儒者談先王時變貴能通要在不失道安得苟取容叔孫遇
漢祖千載此一逢野外爲綿蕞遂稱禮樂宗嗟嗟魯兩生老
死不相從

鄭莊吾郡人雅懷真好事推轂天下才不啻自口出松柏陰
芷蕸威施惜娉婷大人苟愛士善氣自相迎周公不吐握後
世何傳稱

鳥鳴求友聲人生重朋寮嫵婉一以展榮瘁寧易操樂布哭
彭越田叔明張敖豈不愛腰領風惜懷久要兎絲本易附隨
風何能牢推刃匪異人哀哉刎頸交

登令武山絕頂

傾榮通微徑高崖勢欲驚晴雲開二室秋色滿中原烟暝千

林接風迴萬壑奔便思跨鸞鶴變化看鵬鯤

吾自

門寂羅從設庭閑客到稀催兒樹鷄柵看婦補牛衣頗著人
前癩渾忘世上機蕭然吾自慣不是惡輕肥

彭光斗

字賁園溧陽人乾隆二十四年舉人官福建永定知縣
有越遊草

夜泊吳江聞笛

今夜寒山寺鐘聲定有無何人吹玉笛祇益客心孤露泣水
楊柳月明山鷓鴣倚舷聽未徹流響散平湖

禹陵

按誌禹穴有數處
或以陽明洞爲是

山繞無諸國天營大禹陵百靈朝玉笥千仞闕金繩敷土何

時到元圭久上昇寂寥仙洞在稽古信難徵

蘭亭

蘭亭爲後人移遷別所其蹟不可訪矣

見說流觴處蘭亭蹟久涇更無修稷客猶記永和春翰墨關塵劫林泉索解人早知題序意俯仰已成陳

獨客

獨客易生感清宵孰與同睡遲依警鶴詩苦答吟蟲竹邇無全月蕉叢有敗風寂寥燈一點故傍小窓紅

雨坐

隱几孤懷澹閒簾暮色幽濕雲千里夢紅葉滿堦愁雁度看無影蛩寒語不休欲眠還翦燭拊枕聽更籌

陸遵書

字扶遠嘉定人乾隆二十四年舉人官會同知縣

壬午進呈山水冊恭題

兩湖松間石烟開竹裏扉日長看畫筆山靜見天機
松色連青嶂層樓挹曉霞九天瀉飛瀑流得到山家
疎花穿細柳古屋傍青山可似萍香汴好風曲水灣

恭題進呈松梅竹石冊

十竿五竿修竹一株兩株古松近水似無還有遠山欲淡仍
濃

蘆葉洲前夜月梅花村裏曉風船泛溪南溪北人在詩中畫
中

張銘

字新盤號警堂南城人乾隆二十四年舉人官至松太
兵備道

讀史偶然作

丈夫重節概文藝乃其餘咄哉莽大夫寂寞草元居執拘半
山老誤國在誤書情乖性以移荒謬喪厥初文章空垂世名
實總難誣千載憶其人未嘗不歔歔

荒菊

不殖還同我金錢訝許圓癯容侵暮雨冷味澹荒烟未肯逢
人笑寧能受世憐關情彭澤令猶憶舊斜川

張時風

字虞琴仁和人乾隆二十四年舉人官刑部主事

聽秋圖

碧虛來商飈孤情倚秋樹妙以不聽聽生波參無住底事未
至悲不問廬陵賦君子六欲清聲塵脫神悟桐高素月陰石

瘦蒼苔附瓦生真憎忌輕衫濕背露

暮春湖上

草色綠無涯垂楊夾道遮湖雲低覆塔林雨半吹花白舫垂
綸客青旗賣酒家余情獨紆軫轉徙路三叉

湖海詩傳卷二十一